

即事集

五言絕句

鹿谷賞螢

鹿谷尋幽徑，繁星灑作螢。流輝照涼夜，堪醉不堪醒。

悼詩人周夢蝶

花倦自飄落，化泥頻蝶來。戀香終日去，時與夢徘徊。

七言絕句

過北宜公路

峰青幾變袖藏涼，車過龜山已夕光。最是多情北宜路，九彎相送入他鄉。

贈同窗王慧中生日

雲開清月耐人看，對影成三夜已闌。聽講臨風還記否，一詩遙寄祝平安。

讀臺靜農先生詩有感

天地沉吟漂泊身，老來詩句飲甘醇。都將桃李鴟城樹，化作騷壇一片春。

慰同窗劉芝慶

橫風吹雨打新塘，一片傷心吞淚藏。多少眼前艱苦事，都成隱晦待天光。

遊牡丹園

姚黃魏紫自爭新，蜂暱園花儼向人。袖不忘攜牡丹馥，歸來欲灑一堂春。

學子讀詩

又到鐘聲破睡時，晴窗坐對動相思。師言已共雲飄去，青鳥飛來勸讀詩。

五言律詩

重陽登高

天地來秋色，浮沉空首搔。卅年仍作客，九日獨登高。
菊滿花情薄，樽深酒興豪。蘭陽斜照裡，點點是醇醪。

過忘憂森林

擁翠忘憂去，雨餘山色清。沼杉雲弄影，風袖水行聲。

舒卷嵐煙幻，參差夢境迎。盡將塵事隔，滿眼入詩情。

情文

情文何處造？閱歷琢靈光。筆底波濤湧，胸中蘭菊香。
書囊千里日，詩思九迴腸。奇句隨魂動，淋漓元氣長。

七言律詩

同窗許哲銘從台中寄書有感

忽奉書函月照微。青矜語笑尚依稀。孤鴻北往滄桑是，烏鵲南來故舊非。
百代光陰如過客，一年容易又冬輝。台中此去三千里，恨不輕軀逐夢飛。

學友偃蹇筆諸臉書讀後有感贈詩

車行國道雨斜飛，膠刷頻頻伴爾歸。已放天晴迷客眼，更翻雨驟打軺扉。
從知不測風雲日，豈見相生禍福幾？藏器待時懷偃蹇，恥爭蝸角志無違。

懷張師夢機

思巨翻憐小九州，失魂人共夕陽收。浩園花竹頻勞夢，新店風煙半是愁。
聚散無期雲北去，悲歡有計日西流。箋天難寫師生事，山色環城撲藥樓。

詩思

不是無端法古賢，須磨詩思著先鞭。深敲子美驚人句，更誦淵明飲酒篇。
不落前人舊堂廡，能開新象杳雲煙。玉山白雪明潭水，吸腹吐成霞滿天。

登一〇一大樓觀景臺

擎天萬仞絕凡埃，修竹天梯接上臺。雲霧蕩胸晴並吐，光燈亂眼晚兼來。
窗前忽覺身如寄，足底卻憐心尚孩。彩墨誰將潑京夜？繁華渲此盡歡回。

與好友共乘捷運

滿天霞綺映袍新，捷運穿堂流水人。轂破重陰驚掣電，風馳長隧碾飛塵。
奔車轉眼吾嗟幻，舊友知音君獨真。且趁相逢同一醉，紅樓直往響鞦韆。
註：紅樓，淡水紅樓。

淡水夜宴紅樓留別好友

紅樓俯對夜潮生，佳釀聊憑弟醉兄。皎白登盤配蝦蟹，酒黃澆舌試杯觥。
餞雖難忍臨行淚，箋尚能傳相別情。明月不知人散盡，殷勤還下半窗傾。

甲午年讀甲午戰爭史事有感，感而作戰爭詠史詩六首并序

戰史紛紜煙海深，不安提筆復沉吟。愛憎難免評功過，一片詩心伴月斟。

將軍奉詔解天愁，誰使東瀛擾九州？躍馬毛錐書露布，揮鞭羽扇詡風流。
朔風結陣旗多捲，落日連營砲寡謀。莫向遼東歌浪死，返湘無面杞人憂。（其一
湘軍將領吳大澂）

壯歲威名連戰擒，合肥韋虎共朝欽。豈知灞上真兒戲！遂使神州將陸沉。
白骨重澆新涕淚，黃金空贖舊山岑。相臣過往經營地，又見扶桑旭日侵。（其二
北洋通商大臣李鴻章）

長鯨作隊怒乘潮，倭部樓船威海搖。豈謂金蛇銜浪舞，何來鐵鷁駕風飄。
掀翻渤海濤洶湧，偷渡陳倉夜寂寥。已出降幡丁字顫，兩軍雷動九重蕭。（其三
北洋艦隊提督丁汝昌）

平壤城前砲雨飛，當關一將義旌揮。葦山奮臂生吞虜，薩水捐軀死頌徽。
鼓角鳴沙秋日沸，干戈動地暮雲圍。翠翎鶴頂斜陽墜，草木無情亦涕唏。（其四
淮軍將領左寶貴）

風鶴驚傳動至尊，煙迷東海虎狼吞。連檣一砲黃金盡，搖櫓千軍碧血奔。
鐵甲無功成戰骨，洶濤有意洗忠魂。衝圍鼓楫寒潮咽，紅日空留雪浪翻。（其五
致遠號巡洋艦管帶鄧世昌）

賜刀中將總戎行，疾若颯風艦影輕。白水躍騰威海陷，黑煙瀰漫北洋驚。
閒看清艦千衝突，智領皇軍一戰鳴。相照旭旗連萬里，凱歌擊鼓慰神京。（其六
聯合艦隊司令伊東祐亨）

詞

一剪梅·貓空賞櫻

難得和風吹雨停。走春芳尋，啣尾車行。山櫻嶺表抹胭脂，一路穠留，無限嬌傾。
滿袖花香醉興生。不忍輕攀，爭奈重賡。縱懷綵筆意難留，玉面酡紅，淚眼顰青。

浣溪紗·夏日

室外風微伴午眠，蟬聲滿樹沸衝天，曼膚汗雨夢流連。
冰飲扇吹銷惱熱，貪涼軒鼻欲陶然，睡魔端坐臉書前。

漢宮春·淡水觀潮

滬尾重回，看淡江如酒，醉日斜紅。濤聲訴語，往事誰解幽衷。浮沉水鳥，正翻
飛、暗浪波中。酣遠望、遙天暮靄，籠輕艇任飄蓬。

不覺潮來迎月，映連波舞動，春色無窮。觀音坐聽夜水，俗慮傾空。清輝不斷，滿孤身、人月交融。潮起落、無端聚散，別離一路濤風。

臨江仙·大崙山觀雲海

尋徑登臨迷曉色，崙山疑似蓬萊。仙紈誰織送眉來。葉流茶萬片，雲漫浪千堆。腳底靜觀名利幻，胸中微感心開。遠望一白浣塵埃。滌襟懷疊嶂，擷影獨徘徊。

蘇幕遮·詠木棉花

燭龍飛，豪氣吐。花國英雄，血沃春城樹。撐住南天桃杏妒。十丈亭亭，慣作干雲語。

照長空，拋別緒。齊放千紅，莫使春光去。一夜橫風偏帶雨。旋落沉沉，都化滋花土。

高陽臺·槩栝林瀟湘菊花詩三首

余慕曹雪芹，日讀《紅樓夢》。讀至第三十八回〈林瀟湘魁奪菊花詩〉，詩作韻高意遠，深得風人之旨。遂槩栝其三首菊詩：〈詠菊〉無賴詩魔昏曉侵，繞籬欹石自沉音。毫端蘊秀臨霜寫，口角噙香對月吟。〈問菊〉欲訊秋情眾莫知，喃喃負手扣東籬。孤標傲世偕誰隱？一樣開花為底遲。〈菊夢〉籬畔秋酣一覺清，和雲伴月不分明。登仙非慕莊生蝶，憶舊還尋陶令盟。作〈高陽臺〉詞一闕。

無賴詩魔，從昏至曉，杳冥恍惚廝侵。靜繞環籬，西風輕引歸音。毫端韻秀臨霜寫，口噙香、對月低吟。眾何知，欲訊幽情，一片秋心。

孤標傲世偕誰隱，但喃喃負手，蟬吹消沉。一樣開花，何遲馨滿塵襟。覺來籬畔清酣夢，似登仙、月伴雲簪。憶來今，非慕莊生，陶令還尋。